

www.BibleForChildren.org

Matei 26



Mazuwa sita
vyogaponile
kulutila Pasaka,
Yesu nakahiluka
Betaniya, konayali
kikala Lasalo, yula Yesu
yamzilipule kulawa kwa
wabagame. Maliya
nakahola nusu lita ya
mafuta galingununyhilila
ga nado galinguguzigwa kwa sendi
nyinji, nakambakaliza Yesu magulu,
hamba kaibagusa na mnvili za heye. Na ng'handanda
yeng'ha naimema unusi wa kununyhilila.



Hamba Yudas Isikalioti, yumwe wa awala kumi na weli, nakaluta kwa watambika wakulu, leka yambelenhuche Yesu. Watambika wakulu lowahuliche mbuli ayo, nawasangalala, nawalagana na heye wompa sendi. Lelo Yuda nakaluka kupala ndaze vyoyombelenhuka.



Walanguswa wadita kota Yesu
vyoyawalajize, nawawika goya
ndiya ya Pasaka. Nalowali wolya,
Yesu kahola ibumunda, kamtogola
Nguluwi, kaumogola, kawagawila
walanguswa yolonga, "Mhole mulye,
alu ndo lukuli lwa heni."



Hamba kahola chizombe,
katambichiza, kawapa yolonga,
"Munwe weng'ha, mina ayi
ndo danda ya heni ilingweneza
ilagano Iya Nguluwi na wanhu wa
heye, danda ilingubohoka kwa
chiwalo cha wanhu weng'ha
kuwosela gehile ga hewo."



"Simoni, Simoni! Hulichize! Limazoga Iyangugana kuwabetani hemwe kota munhu yobeta uhemba. Ila heni ndokulandila kwa Nguluwi leka makundo ga hegwe galeche kuwa mado. Wone uhiluche kuli heni wasindamize nhumbula wang'holozo."



Petili nakalonga, "Mkulu, heni ng'hunda kuluta na hegwe mchinweng'ho na kuli kubagama." Yesu nakamlonjela, "Ndangukulonjela Petili, lehano izogolo ling'hali kwika, kombela kadatu kota hunzelele heni."



Hamba Yesu kaluta nawo kuli kamgunda ka migodi Getisemane, kawalonjela walanguswa wa heye, "Mikale hano na heni ndute hala hamwando ndikalande." Nakalonga, "Mhaza wa heni, hegwe kuna ludali lwa vinhu vyeng'ha. Umbusile achi chizombe, ila ileche kuwa kota vyondilingugana heni, leka kota vyougana hegwe."



Ahyo Yudasi na chilundo cha wamizi na vitumagwa walawile kwa watambika wakulu na Mafalisayo woya kuli kamgunda kala ka migodi. Nawawele waholile vimwemwesa, vyenje na vinhu vya kutowela.

Na myao yumwe kamtowa kwa ipanga chitumagwa yumwe wa mtambika mkulu, nakamdumula ikutu lya kudilo. Baho Yesu nakalonga. "Leka ayi ikwila!" Kalidoliza lila ikutu na kumlohola.



Wambata Yesu na kumhola, waluta naye kuli ng'handanda ya mtambika mkulu. Petili kazangumuwinza kumbele nayali kutali. Nawawesa chenje hagati hali luga, wekalisa hamwe, Petili na kekalisa hamwe na hewo.



Chitumagwa yumwe wa mtambika mkulu, mng'holoze na munhu yatemigwe ikutu na Petili, nakamuuza Petili, "Hambi nasikuwene hegwe hamwe na heye akula kuli kamgunda ka migodi?" Kahi Petili kabela kalonga, "Hebu!" Baho izogolo nalika. Petili kalawa kunze, nakalila lukami.



Hamba, wanhu weng'ha wenuka,
wamigala Yesu kwa Pilato. Pilato
nakamuuzza, "Hegwe kwa mndewa
wa wayahudi?" Yesu kedichila
nakamlonjela, "Hegwe kulonga."
Pilato nakagana
kumlechela Yesu,
yolawa kalongana nawo
kahi, ila hewo wachemeleza,
"Muwambeni mumsalaba,


muwambeni mumsalaba."



Pilato nakamlavya Yesu, kawapa hewo mmoko mwao wakamuwambe mumsalaba. Aho nawamhola Yesu. Yesu nakalawa kunze yapichile msalaba wa kumuwambila mbaka honhu halihochemigwa izeje Iya mutwi, kwa Chiebulaniya Goligota.




Wamuwamba Yesu mumsalaba
hamwe na wanhu wanji weli, yumwe
kumoso na yumwe kudilo, heye
nayali hagati.



Yali iwele saa sita nemisi; jiza ligubika isi yeng'ha
mbaka saa tisa na ipaziya Iya honhu helile ng'hatu kuli
ng'handanda ya Nguluwi lidejeka vibende vili. Yesu nakalila
kwa kuchemelela,

“Mhaza mmoko wa hegwe
ndanguwika muhe wa heni.”

Na loyalonjile hino,
nakatwesemka Iwa mwisio.



Aho nakoya Yusufu mwenyeng'have
wa Alimataya. Nayali munhu
yumwe wa wanhu wakulu kuli
chitala, nayali yobeteza
kuya kwa Undewa wa
Nguluwi. Lelo
nakamlutila Pilato ne
kudumba,
nakalanda

yapegwe lukuli Iwa
Yesu.



Aho Yusufu nakagula sanda iwele na utabuli uzelu, nakaudulisa hasi lukuli, nakahola sanda inojile ng'hatu na kufunjiliza lukuli na kaluta kuwika kuli chilaga chihongoligwe kuli italawe liwele kota mhalika. Nakalihejeza iganga hali lwizi.



Hamitondo, zuwa iyage ila ya
kwesela, watambika wakulu na
Mafalisayo nawamlutila
Pilato, nawalonga,
"Mkulu, tukumbuchila
kota yula mhadi loyali
mkomu nakalonga
'Zuwa Iya kadatu
ndozilipuka.'"



"Lelo waluta walolela chilaga,
nawazenjelela mchanya
mwa iganga na
wawaleka baho
wamizi wololela."



Loimalile Zuwa Iya Kwesela, behi na
kubwemwenzuka zuwa ila ya
Jumapili, Maliya Madelena
na yula Maliya yunji,
nawaluta kulola chila
chilaga.



Baho du nakulawila limachinyina,
mhilisi wa kilanga wa Mkulu
nakadulika kulawa kilanga,
kalibidusa lila iganga
hafungo, nakulikalila.

Wamizi wa chila
chilaga
nawakakama aku
wodumba heko,

nawazilika kota
wanhu wabagame.



Ila yula mhilisi wa kilanga
nakawalonjela wala wadala,
“Hemwe mleche kudumba!
Ndivizela kota
mwangumpala Yesu
yawambigwe
mumsalaba.”
Haduhu hano mina
kazilipuka kota




vyonayalonjile.
Muye mlole honhu
howamuwichile.



Wawele wodumba na kusangalala kukulu,
awo wadala nawoka himahima hali
chilaga, nawabilima kuluta
kuwalonjela walanguswa wa heye.
Baho, Yesu nakating'hana na
hewo, nakalonga, "Mlamche
hemwe." Hewo wadala
wamlutila, webata magulu

ga heye na kumfugamila.





Hamba Yesu nakawalawila awala walanguswa kumi na
yumwe nalowawele wolya hamwe mchisaga.
Nakawang'hanuchila lukami kwa chiwalo cha kuleka
kukunda na ibamba lyawo, mina nahawawakundile
wala wamuwene hala loyazilipuche. Mkulu Yesu
loyasindile kulonga nawo, nakaholigwa kuka kilanga,
nakekala nzingo ya kudilo kwa Nguluwi.



Nguluwi nakawagana wanhu wa
isi, mbaka kamigala Mwanage
yaliyeng'ha leka chila munhu
yomkunda yaleche kubagama
ila yawe na ukomu wa
mazuwa gose ne
kuduma.



Waloma 3:23 Wanhu weng'ha wadita gehile na wamalilwa
na ukulu wa Nguluwi.

Waloma 6:23 Mina chonolo cha gehile ndo kubagama, ila
ndolendole yalingulavya Nguluwi ndo ukomu wa mazuwa
gose kuli kilumba na Yesu Kilistu, Mkulu wa hetwe.

Waebulaniya 9:27 Lelo wone vila chila munhu kobagama
mala imwe hela, hamba kokwima kumwando hali
utaguso wa Nguluwi,

Waefeso 2:8,9 Mina kwa kunoga kwa Nguluwi, mloholigwa
kwa makundo. Makundo ago hagalawile na kigayila kwa
hemwe, ila ndo ndolendole za Nguluwi. Na hambe lilawile
na madito ga hemwe baho, yaleche munhu
yoneche kidayila chinhu.



Waloma 10:9,10 Houvumila kwa mlomo wa hegwe kuta Yesu ndo Mkulu na kukunda mnhumbula ya hegwe kuta Nguluwi nakamzilipula kuli wanhu wabagame, kolohoka. Mina munhu kangukunda kwa nhumbula kanguditigwa yatanganiche na kuvumila kwa mlomo leka yaloholigwe.

Yohana 3:16,17 Nguluwi nakawagana wanhu wa isi, mbaka kamigala Mwanage yaliyeng'ha leka chila munhu yomkunda yaleche kubagama ila yawe na ukomu wa mazuwa gose ne kuduma. Nguluwi hamwigale Mwanage kuli isi leka yawataguse wanhu, ila kamigala yawalohole.



1 Yohana 5:11-13 Na ulolezi wuwo ndo awu, Nguluwi nakatupa Ukomu wa mazuwa gose ne kuduma na ukomu awo ndo wa mli mwanage. Yoneche yawelengumkunda Mwana wa Nguluwi kanawo ukomu awo, na yohambe yamkunde Mwana wa Nguluwi, kahela ukomu. Ndanguwandichila leka muwe mvizela kota mwanawo ukomu wa mazuwa gose ne kuduma hemwe mlingukunda mli itagwa Iya Mwana wa Nguluwi.



Matei 26-28; Lukasi 22-24; Yohana 13-21

Storyline by: Edward D. Hughes

Illustrated by: Janie Forest
and Alastair Paterson

Adapted by: Lyn Doerksen

Vidunda Bible (vid) © 2014 Pioneer Bible Translators and
The Word for the World Old Testament books © 2018
Pioneer Bible Translators

<https://www.bible.com/bible/1221/GEN.1.CHIVIDUNDA>

©2026 Bible for Children, Inc.

www.M1914.org

www.bibleforchildren.org

